

**«Հայաստանի պետական տնտեսագիտական համալսարան»
պետական ոչ առևտրային կազմակերպության գիտական խորհուրդ**

ՈՐՈՇՈՒՄ N 1

1 նոյեմբերի 2019 թվականի

**2018-2019 ուսումնական տարվա երկրորդ կիսամյակի
քննաշրջանի արդյունքների և խնդիրների մասին**

Լսելով և քննարկելով «**2018-2019 ուսումնական տարվա երկրորդ կիսամյակի քննաշրջանի արդյունքների և խնդիրների մասին**» հարցը (զեկուցող՝ ուսումնական աշխատանքների գծով պրոռեկտոր, տնտեսագիտության թեկնածու, դոցենտ Ա.Վ.Գրիգորյան)՝ գիտական խորհուրդն արձանագրում է. կիսամյակի ընթացքում ռեկտորատը, ուսումնական գործընթացի կազմակերպման բաժինը, դեկանատները և ամբիոնները հետևողական աշխատանք են կատարել քննաշրջանը կազմակերպված անցկացնելու ուղղությամբ: Կիսամյակի ընթացքում համահամալսարանական հիմնական առարկաների գծով կազմակերպվել և անցկացվել են գիտելիքների համակարգչային, գրավոր թեստային և բանավոր ստուգումներ: Ստուգումները կազմակերպվել են գործող կարգի պահանջներին համապատասխան: Խախտումներ և ծախողումներ չեն արձանագրվել:

Ռեկտորատը, դեկանատները և ամբիոնները մեծ ուշադրություն են դարձրել ոչ միայն գիտելիքների ստուգման գործընթացի կազմակերպման և անցկացման, այլ նաև կիսամյակի ընթացքում ուսումնական գործընթացի պատշաճ կազմակերպման հարցերին:

2018-2019 ուսումնական տարվա երկրորդ կիսամյակի քննաշրջանին (առանց 1-ին և 2-րդ վերահանձնումների) առկա և հեռակա ուսուցման բակալավրիատում և մագիստրատուրայում մասնակցել է 4023 ուսանող. նրանցից դրական գնահատականներ են ստացել 3005-ը կամ 74,7%-ը, ինչը 3,7%-ով պակաս է առաջին քննաշրջանի արդյունքից (78,4%): Քննաշրջանից, 1-ին և 2-րդ վերահանձնումներից հետո համալսարանից հեռացման ենթակա է 84 ուսանող (առանց առկա ուսուցման բակալավրիատի 4-րդ կուրսի մեկ անգամ ևս վերահանձնողների): Եվս 11 ուսանող ենթակա է հեռացման առավելագույնը 12 կրեդիտ կազմող ակադեմիական պարտքը մարել չկարողանալու հետևանքով: 110 ուսանող առավելագույնը 12 կրեդիտ կազմող ակադեմիական պարտքերով դեռևս շարունակում են ուսումը: Առկա ուսուցման բակալավրիատում ուսման առաջադիմությունը կազմել է 86,9% (առաջին կիսայակում՝

83,4%), առկա ուսուցման մագիստրատուրայում՝ 90,6% (առաջին կիսամյակում՝ 89,3%), հեռակա ուսուցման բակալավրիատում՝ 55,3% (առաջին կիսամյակում՝ 65,2%) և հեռակա ուսուցման մագիստրատուրայում՝ 87,4% (առաջին կիսամյակում՝ 78,2%): Նախորդ տարվա առաջին կիսամյակի քննաշրջանի համեմատությամբ ուսման առաջադիմությունը առկա ուսուցման բակալավրիատում և հեռակա ուսուցման մագիստրատուրայում բարելավվել է համապատասխանաբար՝ 3,5%-ով և 9,2%-ով, առկա ուսուցման մագիստրատուրայում գրեթե չի փոխվել, իսկ հեռակա ուսուցման բակալավրիատում այն նվազել է 9,9%-ով: Առկա ուսուցման համակարգում ուսման առաջադիմությունը ըստ ուսումնառության տևողության ունի աճի միտում. որքան երկարում է ուսումնառությունը, այնքան ուսման առաջադիմությունն ավելի բարձր է: Առկա ուսուցման բակալավրիատի 1-ին, 2-րդ և 3-րդ կուրսերում ուսման առաջադիմությունը համապատասխանաբար կազմել է 76,1%, 82,3% և 87,8%, իսկ առկա ուսուցման մագիստրատուրայի 1-ին կուրսում՝ 90,6%: Հեռակա ուսուցման համակարգում ուսումնառության տևողության և առաջադիմության միջև նման կապ առկա չէ: Բակալավրիատում, ըստ առանձին կրթական ծրագրերի, ֆինանսական, մարքեթինգի և բիզնեսի կազմակերպման, ՏԿ և ՄՏՀ ֆակուլտետներում ուսման առաջադիմությունը զգալի բարձր է համալսարանի ուսանողների միջին առաջադիմության ցուցանիշից, մնացած ֆակուլտետներում այն մոտ է միջինին: Մագիստրատուրայում, ըստ առանձին կրթական ծրագրերի, ֆինանսական ֆակուլտետում ուսման առաջադիմությունը զգալի ցածր է, իսկ հաշվապահական հաշվառման և աուդիտի ֆակուլտետում զգալի բարձր է համալսարանի ուսանողների միջին առաջադիմության ցուցանիշից, մնացած ֆակուլտետներում այն մոտ է միջինին:

Արձանագրելով կատարված աշխատանքները, գիտական խորհուրդը, միաժամանակ, նշում է՝ դեռևս կան թերություններ և չլուծված խնդիրներ.

1. Չբավարարող մակարդակ ունի այն դասընթացների ծրագրերի կատարումը, որոնք ավարտվում են բանավոր քննությամբ:
2. Ուսանողական հարցումների արդյունքները և ուսանողների կողմից իրենց դասավանդողների մատնանշումները փաստում են, որ դեռևս առկա են միմյանց փոխարեն դասընթաց վարելու դեպքեր:
3. Թերություններ կան դասախոսների կողմից ուսանողների հաճախումների, ակտիվության գնահատման և ամփոփման աշխատանքներում:
4. Շատ դասընթացների գծով առարկայական հարցաշարերը և թեստային բազաները բարեփոխման և թարմացման կարիք ունեն:
5. Քննաշրջանից առաջ թեստային բազաների ստուգումները թերի են կատարվում կամ ձևական բնույթ են կրում:

6. Որոշ, իրարից բովանդակությամբ տարբեր դասընթացների թեստային ստուգումները կազմակերպվում են միևնույն թեստային բազաներով:

Ելնելով վերոնշյալից՝ գիտական խորհուրդը

ՈՐՈՇՈՒՄ Է.

1. Հանձնարարել ռեկտորատին՝

- 1) արձանագրված թերությունների վերացման համար մշակել որոշակի միջոցառումներ՝ նշելով պատասխանատուներին,
- 2) ամբողջացնել ուսումնական գործընթացի կազմակերպման և վարչարարության իրականացման կարգավորումների համակարգը՝ ապահովելով դրանց ներդաշնակությունը բակալավրական ու մագիստրոսական կրթական ծրագրերում,
- 3) ներդնել կրթական ծրագրերի իրականացման որակի մշտադիտարկման կառուցակարգեր,
- 4) նպաստել կրթական ծրագրերի կիրառական բաղադրիչի ընդլայնմանը միտված միջոցառումների իրականացմանը,
- 5) նպաստել համալսարանում պրոֆեսորադասախոսական կազմի մասնագիտական որակավորման բարձրացման միջոցառումների իրականացմանը,
- 6) ներդնել դասախոսների կողմից՝ իրենց ուսումնական բեռնվածության օրացուցային պլանով նախատեսված աշխատանքների չկատարման դեպքում աշխատանքի վարձատրության վերահաշվարկի կառուցակարգեր:

2. Հանձնարարել ֆակուլտետների ղեկաններին՝

- 1) ֆակուլտետների խորհուրդների նիստերում քննարկել գիտական խորհրդի որոշումները, հետևողական լինել դրանք ժամանակին կատարելու և արձանագրված թերություններն ու բացթողումները շտկելու հարցերում,
- 2) ղեկոսմբերի 1-ից ֆակուլտետից նշանակված պատասխանատուների և ամբիոնների դասախոսների ներգրավմամբ մեկնարկել էլեկտրոնային ղեկանատի գործառույթը՝ զուգահեռաբար համակարգ մուտքագրելով 2019-2020 ուստարվա սեպտեմբերի 1-ից դասամատյաններում կատարված գրանցումները,
- 3) դասախոսների և ուսանողների դասաձախողումների դեպքերը քննարկել ֆակուլտետների խորհուրդների և ամբիոնների նիստերում՝ անհրա-

ժեշտության դեպքում հարցը դարձնելով նաև ռեկտորատի քննարկման առարկա,

- 4) դասախոսների կողմից միմյանց փոխարեն դասավանդման դեպքերը քննարկել ամբիոնների և ֆակուլտետների խորհուրդների նիստերում՝ անհրաժեշտության դեպքում հարցը դարձնելով նաև ռեկտորատի քննարկման առարկա,
- 5) պարբերաբար քննարկել ուսանողների բացակայությունների հարցը, մշակել միջոցառումներ դրանք նվազեցնելու ուղղությամբ:

3. Հանձնարարել ամբիոնների վարիչներին՝

- 1) վերանայել դասընթացների հարցաշարերն ու թեստային բազաները, դրանցում բացառել երկիմաստ հարցերը: Վերանայված հարցաշարերը տրամադրել լրատվության և հասարակայնության հետ կապերի բաժնին համալսարանի կայքում զետեղելու համար,
- 2) մինչև 2019-2020 ուսումնական տարվա ավարտը համաբուհական բոլոր դասընթացները և ամբիոնների կողմից սպասարկվող կրթական ծրագրերի առնվազն 3 դասընթացի սպասարկումն ամբողջությամբ կազմակերպել Moodle համակարգով՝ այդ նպատակով ձևավորելով և համակարգ ներբեռնելով հայալեզու և օտարալեզու ուսումնառության նյութեր (ըստ դասընթացի առանձին թեմաների), սեմինար պարապմունքների, անհատական կամ խմբային աշխատանքների հանձնարարություններ, ուսանողների գիտելիքի ստուգման այլ հանձնարարություններ (իրավիճակային խնդիրներ, քեյսեր և այլն),
- 3) մագիստրատուրայում թույլատրել դասավանդելու միայն գիտական աստիճան (կամ գիտական կոչում) և հետազոտական ակտիվություն ցուցաբերող դասախոսներին կամ պետական և մասնավոր հատվածների կազմակերպությունների այն մասնագետներին, ովքեր տվյալ դասընթացի մասնագիտական բնագավառում ունեն առնվազն 3 տարվա աշխատանքային փորձ,
- 4) իրականացնել ամբիոնի պրոֆեսորադասախոսական կազմի կողմից իրենց պայմանագրային պարտավորությունների պատշաճ կատարման մշտադիտարկումներ, ինչպես նաև դասալսումներ՝ արդյունքները քննարկելով ամբիոնի նիստերի ընթացքում,
- 5) յուրաքանչյուր տարի թարմացնել դասախոսությունների հայալեզու նյութերը, ուսումնառության համար պարտադիր և երաշխավորվող գրականության հայալեզու և օտարալեզու աղբյուրների ցանկերը:

4. Սույն որոշումը քննարկել ամբիոնների և ֆակուլտետների խորհուրդների նիստերում, մշակել միջոցառումներ ուսումնական գործընթացը բարելավելու ուղղությամբ:

5. Սույն որոշման կատարման նկատմամբ հսկողությունը վերապահել ուսումնական աշխատանքների գծով պրոռեկտոր Ա.Վ. Գրիգորյանին:

Գիտական խորհրդի նախագահ՝

2019 թ. նոյեմբերի 1
Երևան



Դ. Ռ. Գալոյան